



श्री हनुमान बाहुक

संस्कृत



छप्पय

सिंधु तरन, सिय-सोच हरन, रबि बाल बरन तनु ।  
भुज बिसाल, मूरति कराल कालहु को काल जनु ॥  
गहन-दहन-निरदहन लंक निःसंक, बंक-भुव ।  
जातुधान-बलवान मान-मद-दवन पवनसुत ॥

श्री हनुमान बाहुक

1



स्वर्न-सैल-संकास कोटि-रवि तरुन तेज घन ।

उर विसाल भुज दण्ड चण्ड नख-वज्रतन ॥

पिंग नयन, भूकुटी कराल रसना दसनानन ।

कपिस केस करकस लंगूर, खल-दल-बल-भानन ॥

कह तुलसिदास बस जासु उर मारुतसुत मूरति विकट ।

संताप पाप तेहि पुरुष पहि सपने हूँ नहिं आवत निकट ॥

श्री हनुमान बाहुक



### झूलना

पंचमुख-छःमुख भगु मुख्य भट असुर सुर,  
सर्व सरि समर समरत्य सूरु ।  
बाँकुरो बीर बिरुदैत बिरुदावली,  
बेद बंदी बदत पैजपूरु ॥

जासु गुनगाथ रघुनाथ कह जासुबल,  
बिपुल जल भरित जग जलधि झूरु ।  
दुवन दल दमन को कौन तुलसीस है,  
पवन को पूत रजपूत रुरु ॥

श्री हनुमान बाहुक





## घनाक्षरी

भानुसों पढ़न हनुमान गए भानु मन-  
अनुमानि सिसु केलि कियो फेर फारसो ।  
पाछिले पगनि गम गगन मगन मन,  
क्रम को न भ्रम कपि बालक बिहार सो ॥  
कौतुक बिलोकि लोकपाल हरिहर विधि,  
लोचननि चकाचौंधी चित्तनि खभार सो ।  
बल कैंधो बीर रस, धीरज कै, साहस कै,  
तुलसी सरीर धरे सबनिको सार सो ॥

श्री हनुमान बाहुक



भारत में पारथ के रथ केथू कपिराज,  
गाज्यो सुनि कुरुराज दल हल बल भो ।  
कह्यो द्रोण भीषम समीर सुत महाबीर,  
बीर-रस-बारि-निधि जाको बल जल भो ॥  
बानर सुभाय बाल केलि भूमि भानु लागि,  
फलंग फलंगहूँतेँ घाटि नभ तल भो ।  
नाई-नाई-माथ जोरि-जोरि हाथ जोधा जो हैं,  
हनुमान देखे जगजीवन को फल भो ॥

श्री हनुमान बाहुक





गो-पद पयोधि करि, होलिका ज्यों लाई लंक,  
निपट निःसंक पर पुर गल बल भो ।  
द्रोन सो पहार लियो ख्याल ही उखारि कर,  
कंदुक ज्यों कपि खेल बेल कैसो फल भो ॥  
संकट समाज असमंजस भो राम राज,  
काज जुग पूगनि को करतल पल भो ।  
साहसी समथ तुलसी को नाह जाकी बाँह,  
लोकपाल पालन को फिर थिर थल भो ॥

श्री हनुमान बाहुक

6



कमठ की पीठि जाके गोड़नि की गाड़ैं मानो,  
नाप के भाजन भरि जल निधि जल भो ।  
जातुधान दावन परावन को दुर्ग भयो,  
महा मीन बास तिमि तोमनि को थल भो ॥  
कुम्भकरन रावन पयोद नाद ईंधन को,  
तुलसी प्रताप जाको प्रबल अनल भो ।  
भीषम कहत मेरे अनुमान हनुमान,  
सारिखो त्रिकाल न त्रिलोक महाबल भो ॥

श्री हनुमान बाहुक





दूत राम राय को, सपूत पूत पौनको तू,  
अंजनी को नन्दन प्रताप भूरि भानु सो ।  
सीय-सोच-समन, दुरित दोष दमन,  
सरन आये अवन लखन प्रिय प्राण सो ॥  
दसमुख दुसह दरिद्र दरिबे को भयो,  
प्रकट तिलोक ओक तुलसी निधान सो ।  
ज्ञान गुनवान बलवान सेवा सावधान,  
साहेब सुजान उर आनु हनुमान सो ॥

श्री हनुमान बाहुक



दवन दुवन दल भुवन बिदित बल,  
बेद जस गावत बिबुध बंदी छोर को ।  
पाप ताप तिमिर तुहिन निघटन पटु,  
सेवक सरोरुह सुखद भानु भोर को ॥  
लोक परलोक तें बिसोक सपने न सोक,  
तुलसी के हिये है भरोसो एक ओर को ।  
राम को दुलारो दास बामदेव को निवास,  
नाम कलि कामतरु केसरी किसोर को ॥

श्री हनुमान बाहुक





महाबल सीम महा भीम महाबान इत,  
महाबीर बिदित बरायो रघुबीर को ।  
कुलिस कठोर तनु जोर परै रोर रन,  
करुना कलित मन धारमिक धीर को ॥  
दुर्जज को कालसो कराल पाल सज्जन को,  
सुमिरे हरन हार तुलसी की पीर को ।  
सीय-सुख-दायक दुलारो रघुनायक को,  
सेवक सहायक है साहसी समीर को ॥

श्री हनुमान बाहुक



रचिबे को बिधि जैसे, पालिबे को हरि हर,  
मीच मारिबे को, ज्याईबे को सुधापान भो ।  
धरिबे को धरनि, तरनि तम दलिबे को,  
सोखिबे कृसानु पोषिबे को हिम भानु भो ॥  
खल दुःख दोषिबे को, जन परितोषिबे को,  
माँगिबो मलीनता को मोदक दुदान भो ।  
आरत की आरति निवारिबे को तिहूँ पुर,  
तुलसी को साहेब हठीलो हनुमान भो ॥

श्री हनुमान बाहुक



सेवक स्योकाई जानि जानकीस मानै कानि,  
सानुकूल सूलपानि नवै नाथ नाँक को ।  
देवी देव दानव दयावने ह्वै जोरैं हाथ,  
बापुरे बराक कहा और राजा राँक को ॥  
जागत सोवत बैठे बागत बिनोद मोद,  
ताके जो अनर्थ सो समर्थ एक आँक को ।  
सब दिन रुरो परै पूरो जहाँ तहाँ ताहि,  
जाके है भरोसो हिये हनुमान हाँक को ॥

श्री हनुमान बाहुक



सानुग सगौरि सानुकूल सूलपानि ताहि,  
लोकपाल सकल लखन राम जानकी ।  
लोक परलोक को बिसोक सो तिलोक ताहि,  
तुलसी तमाइ कहा काहू बीर आनकी ॥  
केसरी किसोर बन्दीछोर के नेवाजे सब,  
कीरति बिमल कपि करुनानिधान की ।  
बालक ज्यों पालि हैं कृपालु मुनि सिद्धता को,  
जाके हिये हुलसति हाँक हनुमान की ॥

श्री हनुमान बाहुक



करुनानिधान बलबुद्धि के निधान हौ,  
महिमा निधान गुनज्ञान के निधान हौ ।  
बाम देव रूप भूप राम के सनेही, नाम,  
लेत देत अर्थ धर्म काम निरबान हौ ॥  
आपने प्रभाव सीताराम के सुभाव सील,  
लोक बेद बिधि के बिदूष हनुमान हौ ।  
मन की बचन की करम की तिहूँ प्रकार,  
तुलसी तिहारो तुम साहेब सुजान हौ ॥

श्री हनुमान बाहुक



मन को अगम तन सुगम किये कपीस,  
काज महाराज के समाज साज साजे हैं ।  
देवबंदी छोर रनरोर केसरी किसोर,  
जुग जुग जग तेरे बिरद बिराजे हैं ॥  
बीर बरजोर घटि जोर तुलसी की ओर,  
सुनि सकुचाने साधु, खलगन गाजे हैं ।  
बिगरी सँवार अंजनी कुमार कीजे मोहिं,  
जैसे होत आये हनुमान के निवाजे हैं ॥

श्री हनुमान बाहुक





सवैया

जान सिरोमनि हो हनुमान सदा  
जन के मन बास तिहारो ।  
ढारो बिगारो मैं काको कहा केहि  
कारन खीझत हीं तो तिहारो ॥  
साहेब सेवक नाते तो हातो कियो  
सो तहां तुलसी को न चारो ।  
दोष सुनाये तें आगेहूँ को होशियार ह्वै  
हों मन तो हिय हारो ॥

श्री हनुमान बाहुक



तेरे थपै उथपै न महेस,  
थपै थिर को कपि जे उर घाले ।  
तेरे निबाजे गरीब निबाज  
बिराजत बैरिन के उर साले ॥  
संकट सोच सबे तुलसी लिये नाम  
फटै मकरी के से जाले ।  
बूढ भये बलि मेरिहिं बार,  
कि हारि परे बहुतै नत पाले ॥

श्री हनुमान बाहुक



सिंधु तरे बड़े बीर दले खल,  
जारे हैं लंक से बंक मवा से ।  
तैं रनि केहरि केहरि के बिदले  
अरि कुंजर छैल छवासे ॥  
तोसों समत्थ सुसाहेब सेई  
सहै तुलसी दुख दोष दवा से ।  
बानर बाज बड़े खल खेचर,  
लीजत क्योँ न लपेटि लवासे ॥

श्री हनुमान बाहुक



अच्छ विमर्दन कानन भानि दसानन  
आनन भा न निहारो ।  
बारिदनाद अकंपन कुंभकरन से  
कुंजर केहरि बारो ॥  
राम प्रताप हुतासन, कच्छ, विपच्छ,  
समीर समीर दुलारो ।  
पाप तें साप तें ताप तिहूँ तें  
सदा तुलसी कह सो रखवारो ॥

श्री हनुमान बाहुक





## घनाक्षरी

जानत जहान हनुमान को निवाज्यो जन,  
मन अनुमानि बलि बोल न बिसारिये ।  
सेवा जोग तुलसी कबहूँ कहा चूक परी,  
साहेब सुभाव कपि साहिबी सँभारिये ॥  
अपराधी जानि कीजै सासति सहस भाँति,  
मोदक मरै जो ताहि माहुर न मारिये ।  
साहसी समीर के दुलारे रघुबीर जू के,  
बाँह पीर महाबीर बेगि ही निवारिये ॥

श्री हनुमान बाहुक





बालक बिलोकि, बलि बारें तें आपनो कियो,  
दीनबन्धु दया कीन्हीं निरुपाधि न्यारिये ।  
रावरो भरोसो तुलसी के, रावरोई बल,  
आस रावरीयै दास रावरो बिचारिये ॥  
बड़ो बिकराल कलि काको न बिहाल कियो,  
माथे पगु बलि को निहारि सो निबारिये ।  
केसरी किसोर रनरोर बरजोर बीर,  
बाँह पीर राहु मातु ज्यौं पछारि मारिये ॥

श्री हनुमान बाहुक



उथपे थपनथिर थपे उथपनहार,  
केसरी कुमार बल आपनो संबारिये ।  
राम के गुलामनि को कामतरु रामदूत,  
मोसे दीन दूबरे को तकिया तिहारिये ॥  
साहेब समर्थ तोसों तुलसी के माथे पर,  
सोऊ अपराध बिनु बीर, बाँधि मारिये ।  
पोखरी बिसाल बाँहु, बलि, बारिचर पीर,  
मकरी ज्यों पकरि के बदन बिदारिये ॥

श्री हनुमान बाहुक



राम को सनेह, राम साहस लखन सिय,  
राम की भगति, सोच संकट निवारिये ।  
मुद मरकट रोग बारिनिधि हेरि हारे,  
जीव जामवंत को भरोसो तेरो भारिये ॥  
कृदिये कृपाल तुलसी सुप्रेम पब्बयतें,  
सुधल सुबेल भालू बैठि कै विचारिये ।  
महाबीर बाँकुरे बराकी बाँह पीर क्यों न,  
लंकिनी ज्यों लात घात ही मरोरि मारिये ॥

श्री हनुमान बाहुक







लोक परलोकहूँ तिलोक न विलोकियत,  
तोसे समरथ चष चारिहूँ निहारिये ।  
कर्म, काल, लोकपाल, अग जग जीवजाल,  
नाथ हाथ सब निज महिमा बिचारिये ॥  
खास दास रावरो, निवास तेरो तासु उर,  
तुलसी सो, देव दुखी देखिअत भारिये ।  
बात तरुमूल बाँहसूल कपिकच्छू बेलि,  
उपजी सकेलि कपि केलि ही उखारिये ॥

श्री हनुमान बाहुक



करम कराल कंस भूमिपाल के भरोसे,  
बकी बक भगिनी काहू तें कहा डरैगी ।  
बड़ी बिकराल बाल घातिनी न जात कहि,  
बाँह बल बालक छबीले छोटे छरैगी ॥  
आई है बनाई बेष आप ही बिचारि देख,  
पाप जाय सब को गुनी के पाले परैगी ।  
पूतना पिसाचिनी ज्यों कपि कान्ह तुलसीकी,  
बाँहपीर महाबीर तेरे मारे मरैगी ॥

श्री हनुमान बाहुक





भाल की कि काल की कि रोष की त्रिदोष की है,  
बेदन बिषम पाप ताप छल छाँह की ।  
करमन कूट की कि जन्त मन्त्र बूट की,  
पराहि जाहि पापिनी मलीन मन माँह की ॥  
पैहहि सजाय, नत कहत बजाय तोहि,  
बाबरी न होहि बानि जानि कपि नाँह की ।  
आन हनुमान की दुहाई बलवान की,  
सपथ महाबीर की जो रहै पीर बाँह की ॥

श्री हनुमान बाहुक





सिंहिका सँहारि बल सुरसा सुधारि छल,  
लंकिनी पछारि मारि बाटिका उजारी है ।  
लंक परजारि मकरी बिदारि बार बार,  
जातुधान धारि धूरि धानी करि डारी है ॥  
तोरि जमकातरि मंदोदरी कठोरि आनी,  
रावन की रानी मेघनाद महतारी है ।  
भीर बाँह पीर की निपट राखी महाबीर,  
कौन के सकोच तुलसी के सोच भारी है ॥

श्री हनुमान बाहुक





तेरो बालि केलि बीर सुनि सहमत धीर,  
भूलत सरीर सुधि सक्र रवि राहु की ।  
तेरी बाँह बसत बिसोक लोक पाल सब,  
तेरो नाम लेत रहैं आरति न काहु की ॥  
साम दाम भेद विधि बेदहू लबेद सिधि,  
हाथ कपिनाथ ही के चोटी चोर साहु की ।  
आलस अनख परिहास कै सिखावन है,  
एते दिन रही पीर तुलसी के बाहु की ॥

श्री हनुमान बाहुक



टूकनि को घर घर डोलत कँगाल बोलि,  
बाल ज्यों कृपाल नत पाल पालि पोसो है ।  
कीन्ही है सँभार सार अँजनी कुमार बीर,  
आपनो बिसारि हैं न मेरेह भरोसो है ॥  
इतनो परेखो सब भान्ति समरथ आजु,  
कपिराज सांची कहां को तिलोक तोसो है ।  
सासति सहत दास कीजे पेखि परिहास,  
चीरी को मरन खेल बालकनिको सो है ॥

श्री हनुमान बाहुक





आपने ही पाप तें त्रिपात तें कि साप तें,  
बढ़ी है बाँह बेदन कही न सहि जाति है ।  
औषध अनेक जन्त्र मन्त्र टोटकादि किये,  
बादि भये देवता मनाये अथीकाति है ॥  
करतार, भरतार, हरतार, कर्म काल,  
को है जगजाल जो न मानत इताति है ।  
चेरो तेरो तुलसी तू मेरो कह्यो राम दूत,  
ढील तेरी बीर मोहि पीर तें पिराति है ॥

श्री हनुमान बाहुक





दूत राम राय को, सपूत पूत वाय को,  
समत्व हाथ पाय को सहाय असहाय को ।  
बाँकी बिरदावली बिदित बेद गाइयत,  
रावन सो भट भयो मुठिका के धाय को ॥  
एते बडे साहेब समर्थ को निवाजो आज,  
सीदत सुसेवक बचन मन काय को ।  
थोरी बाँह पीर की बड़ी गलानि तुलसी को,  
कौन पाप कोप, लोप प्रकट प्रभाय को ॥

श्री हनुमान बाहुक





देवी देव दनुज मनुज मुनि सिद्ध नाग,  
छोटे बड़े जीव जेते चेतन अचेत हैं ।  
पूतना पिसाची जातुधानी जातुधान बाग,  
राम दूत की रजाई माथे मानि लेत हैं ॥  
घोर जन्त्र मन्त्र कूट कपट कुरोग जोग,  
हनुमान आन सुनि छाड़त निकेत हैं ।  
क्रोध कीजे कर्म को प्रबोध कीजे तुलसी को,  
सोध कीजे तिनको जो दोष दुख देत हैं ॥

श्री हनुमान बाहुक





तेरे बल बानर जिताये रन रावन सों,  
तेरे घाले जातुधान भये घर घर के ।  
तेरे बल राम राज किये सब सुर काज,  
सकल समाज साज साजे रघुबर के ॥  
तेरो गुनगान सुनि गीरबान पुलकत,  
सजल बिलोचन बिरंचि हरिहर के ।  
तुलसी के माथे पर हाथ फेरो कीस नाथ,  
देखिये न दास दुखी तोसो कनिगर के ॥

श्री हनुमान बाहुक





पालो तेरे ट्रक को परेहू चूक मूकिये न,  
कूर कौड़ी दूको हों आपनी ओर हेरिये ।  
भोरानाथ भोरे ही सरोष होत थीरे दोष,  
पोषि तोषि थापि आपनो न अव डेरिये ॥  
अँबुतू हों अँबु चूर, अँबु तू हों डिंभ सो न,  
बूझिये बिलंब अवलंब मेरे तेरिये ।  
बालक बिकल जानि पाहि प्रेम पहिचानि,  
तुलसी की बाँह पर लामी लूम फेरिये ॥

श्री हनुमान बाहुक





घेरि लियो रोगनि, कुजोगनि, कुलोगनि ज्यों,  
बासर जलद घन घटा धुकि धाई है ।  
बरसत बारि पीर जारिये जवासे जस,  
रोष बिनु दोष धूम मूल मलिनाई है ॥  
करुनानिधान हनुमान महा बलवान,  
हेरि हँसि हाँकि फूँकि फौँजै ते उड़ाई है ।  
खाये हुतो तुलसी कुरोग राढ़ राकसनि,  
केसरी किसोर राखे बीर बरिआई है ॥

श्री हनुमान बाहुक





### सवैया

राम गुलाम तु ही हनुमान,  
गोसाँई सुसाँई सदा अनुकूलो ।  
पाल्यो हों बाल ज्यों आखर दू,  
पितु मातु सों मंगल मोद समूलो ॥  
बाँह की बेदन बाँह पगार,  
पुकारत आरत आनाँद भूलो ।  
श्री रघुबीर निवारिये पीर,  
रहौं दरबार परो लटि लूलो ॥

श्री हनुमान बाहुक





### घनाक्षरी

काल की करालता करम कठिनाई कीधी,  
पाप के प्रभाव की सुभाय बाय बावरे ।  
बेदन कुरभाँति सो सही न जाति राति दिन,  
सोई बाँह गही जो गही समीर डाबरे ॥  
लायो तरु तुलसी तिहारो सो निहारि बारि,  
सींचिये मलीन भो तयो है तिहँ तावरे ।  
भूतनि की आपनी पराये की कृपा निधान,  
जानियत सबही की रीति राम रावरे ॥

श्री हनुमान बाहुक





पाँय पीर पेट पीर बाँह पीर मुंह पीर,  
जर जर सकल पीर मई है ।  
देव भूत पितर करम खल काल ग्रह,  
मोहि पर दवरि दमानक सी दर्ई है ॥  
हौं तो बिनु मोल के बिकानो बलि बारे हीतें,  
ओट राम नाम की ललाट लिखि लई है ।  
कुँभज के किंकर बिकल बूढ़े गोखुरनि,  
हाय राम राय ऐसी हाल कहूँ भई है ॥

श्री हनुमान बाहुक



बाहुक सुबाहु नीच लीचर मरीच मिलि,  
मुँह पीर केतुजा कुरोग जातुधान है ।  
राम नाम जप जाग कियो चहों सानुराग,  
काल कैसे दूत भूत कहा मेरे मान है ॥  
सुमिरे सहाय राम लखन आखर दौऊ,  
जिनके समूह साके जागत जहान है ।  
तुलसी सँभारि ताडका सँहारि भारि भट,  
बेधे बरगद से बनाई बानवान है ॥

श्री हनुमान बाहुक







बालपने सूधे मन राम सनमुख भयो,  
राम नाम लेत माँगि खात टूक टाक हीं ।  
परयो लोक रीति में पुनीत प्रीति राम राय,  
मोह बस बैठो तोरि तरकि तराक हाँ ॥  
खोटे खोटे आचरन आचरत अपनायो,  
अंजनी कुमार सोध्यो रामपानि पाक हाँ ।  
तुलसी गुसाईं भयो भोंडे दिन भूल गयो,  
ताको फल पावत निदान परिपाक हीं ॥

श्री हनुमान बाहुक



असन बसन हीन बिषम बिषाद लीन,  
देखि दीन टूबरो करे न हाय हाय को ।  
तुलसी अनाथ सो सनाथ रघुनाथ कियो,  
दियो फल सील सिंधु आपने सुभाय को ॥  
नीच यहि बीच पति पाइ भरु हाईगो,  
बिहाइ प्रभु भजन बचन मन काय को ।  
ता तें तनु पेषियत घोर बरतोर मिस,  
फूटि फूटि निकसत लोन राम राय को ॥

श्री हनुमान बाहुक



जीओ जग जानकी जीवन को कहाइ जन,  
मरिबे को बारानसी बारि सुर सरि को।  
तुलसी के नल मोदक हैं ऐसे ठाँऊ,  
जाके जिये मुये सोच करिहैं न लरि को ॥  
मो को झूँटो साँचो लोग राम कौ कहत सब,  
मेरे मन मान है न हर को न हरि को ।  
भारी पीर दुसह सरीर तें बिहाल होत,  
सोऊ रघुबीर बिनु सके टूर करि को ॥

श्री हनुमान बाहुक



सीतापति साहेब सहाय हनुमान नित,  
हित उपदेश को महेस मानो गुरु कै ।  
मानस बचन काय सरन तिहारे पाँय,  
तुम्हरे भरोसे सुर मैं न जाने सुर कै ॥  
ब्याधि भूत जनित उपाधि काहु खल की,  
समाधि की जै तुलसी को जानि जन फुर कै ।  
कपिनाथ रघुनाथ भोलानाथ भूतनाथ,  
रोग सिंधु क्यों न डारियत गाय खुर कै ॥

श्री हनुमान बाहुक





कहों हनुमान सों सुजान राम राय सों,  
कृपानिधान संकर सों सावधान सुनिये ।  
हरष विषाद राग रोष गुन दोष मई,  
बिरची बिरज्जी सब देखियत दुनिये ॥  
माया जीव काल के करम के सुभाय के,  
करैया राम बेद कहें साँची मन गुनिये ।  
तुम्ह तें कहा न होय हा हा सो बुझैये मोहिं,  
हों हूँ रहों मौनही वयो सो जानि लुनिये ॥

श्री हनुमान बाहुक



Mere Ram- मेरे राम

